



REPUBLIKA E SHQIPËRISË
KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE

Nr. 1915 / Prot.
3

Tiranë, më 23.01 2015

VENDIM

Nr. 8, datë 23/01 2015

Bazuar në nenin 23 të Kushtetutës së Republikës së Shqipërisë, pikat 3, 5/b të nenit 24 të ligjit nr.119/2014, “Për të drejtën e informimit”, nenin 31/1/a/c të ligjit nr. 9887 datë 10.03.2008, “Për mbrojtjen e të dhënave personale” dhe nenet 93-95 të Kodit të Procedurës Administrative, Komisioneri për të Drejtën e Informimit dhe Mbrojtjen e të Dhënave Personale,

V Ë R E N:

Ankuesi, Qendra “Res Publica” ka depozituar pranë Zyrës së Komisionerit ankesën nr. 1915 Prot., datë 15.12.2014 me objekt, “Refuzim dhënie të informacionit dhe kopje të dokumenteve zyrtare”, ndaj Autoritetit publik/Drejtorisë së Përgjithshme të Policisë së Shtetit. Rezulton se ajo është paraqitur brenda afatit ligjor, në përputhje me pikën 2 të nenit 24 të ligjit nr. 119/2014 “Për të drejtën e informimit”.

Nga dokumentacioni i administruar, rezulton se Qendra “Res Publica” në datë 10.11.2014 ka paraqitur pranë autoritetit publik kërkesën për informacion dhe kopje të dokumenteve zyrtare duke kërkuar “të dijë mbi numrin e personave të vendosur nën përgjim në periudhën 01.01.2014 – 31.10.2014 në Republikën e Shqipërisë”. Drejtoria e Përgjithshme e Policisë së Shtetit nëpërmjet shkresës nr. 9692/1 Prot., datë 03.12.2014, është përgjigjur brenda afatit kohor në përputhje me pikën 1 të nenit 15 të ligjit nr. 119/2014 “Për të drejtën e informimit” duke refuzuar dhënien e informacionit me arsyetimin, se informacioni i kërkuar është i klasifikuar “sekret shtetëror”.

Në ndjekje të procedurës për shqyrtimin administrativ të çështjes, Komisioneri bazuar në pikën 3 të nenit 24 të ligjit nr. 119/2014 “Për të drejtën e informimit” ka kërkuar Drejtorisë së Përgjithshme të Policisë së Shtetit që deri në datë 26.12.2014, të depozitojë parashtrimet me shkrim mbi ankesën e paraqitur nga Qendra “Res Publica”.

Drejtoria e Përgjithshme e Policisë së Shtetit argumenton se vënia në dispozicion e informacionit të kërkuar është në kundërshtim me pikën 2/b të nenit 17 të ligjit nr. 119/2014 “Për të drejtën e informimit”, në të cilën parashikohen kufizimet e dhënies së informacionit në rast të parandalimit, hetimit dhe ndjekjes së veprave penale.

Gjithashtu, në referim të Vendimit nr. 312 datë 16.03.2011 “Për miratimin e rregullores për punën me informacionin e klasifikuar sekret shtetëror” të Këshillit të Ministrave, Drejtoria e Përgjithshme e Policisë së Shtetit argumenton se “Përkthimi, riprodhimi, fragmentizimi i një dokumenti dhe/ose një materiali të klasifikuar përmban të gjithë shenjëzimet e një informacioni të klasifikuar “sekret shtetëror” dhe trajtohet si i tillë”.

Në zbatim të vendimit të sipërpërmendur, ajo citon gjithashtu në parashtrimet e saj, se bazuar në urdhërin e titullarit të institucionit, nr. 1531, datë 24.10.2014, “ Për hartimin e statistikave të kriminalitetit”, ndër të tjera thuhet se “të dhënat statistikore për... përgjimet e komunikimeve klasifikohen “sekret”.

Drejtoria e Përgjithshme e Policisë së Shtetit parashtron faktin se ky informacion ka një afat ruajtje 50(pesëdhjetë) vjet, dhe se rishikimi përveç rasteve të veçanta të parashikuara në ligj, do të bëhet me plotësimin e afatit të përcaktuar.

Komisioneri, bazuar në pikën 3 të nenit 24 të ligjit nr. 119/2014 “Për të drejtën e informimit” zhvilloi më datë 19.01.2015, seancë dëgjimore publike me pjesëmarrjen e palëve.

Në këtë seancë, pretendimet e palëve reflektuan të njëjtat kërkesa dhe shpjegime të dhëna në ankesa e parashtrime.

Pas shqyrtimit të ankesës, parashtrimeve, seancës dëgjimore, si dhe pas konsultimit të legjislacionit përkatës rezultoi se, procesi i përgjimit në tërësi nga autoriteti përgjegjës është klasifikuar “sekret shtetëror” dhe se për klasifikimin e një pjese të tij “të dhënat statistikore” si “sekret shtetëror” është shprehur urdhri i lartpërmendur. Nuk rezultoi që Drejtoria e Përgjithshme e Policisë së Shtetit me marrjen e kërkesës për informacion të ketë vepruar në përputhje me pikën 5 të nenit 17 të ligjit nr.119/2014 “Për të drejtën e informimit”. Në kushte të tilla Drejtoria e Përgjithshme e Policisë së Shtetit duhet të kishte përmbushur detyrimin për të nisur menjëherë procedurën e rishikimit të klasifikimit për informacionin e kërkuar (pjesë e tërësisë së procesit të përgjimit) që gjendet në dokumente të klasifikuara “sekret shtetëror” duke njoftuar kërkuuesin për ndjekjen e kësaj procedure si dhe të vendosë shtyrje të afatit për dhënie të informacionit deri në 30 ditë pune.

Gjithashtu, nuk rezultoi të jetë argumentuar mbi balancën e bërë krahasimisht, për prevalimin e kufizimit të dhënies së informacionit për arsye të dëmtimit të interesave si të parandalimit, hetimit dhe ndjekjes së veprave penale, në raport me të drejtën e individit për tu informuar.

E drejta për t’u informuar është një prej të drejtave themelore të njeriut, e parashikuar në nenin 23 të Kushtetutës së Republikës së Shqipërisë. Kjo e drejtë duhet parë e lidhur ngushtësisht me parimin e transparencës dhe llogaridhënies, si një shtyllë tjetër themelore e një shteti të së drejtës. Funksionimi i tyre do të ishte në interesin e të dy palëve.

PËR KËTO ARSYE

Bazuar në pikën 5/b të nenit 24, të ligjit nr. 119/2014 “Për të drejtën e Informimit”,

V E N D O S A

1. Pranimin e ankesës nr. 1915 Prot., datë 15.12.2014, të ankuesit Qendra “Res Publica” ndaj Drejtorisë së Përgjithshme të Policisë së Shtetit.
2. Urdhërimin e Drejtorisë së Përgjithshme të Policisë së Shtetit, për fillimin menjëherë të procedurës së rishikimit të klasifikimit të dokumentacionit të kërkuar dhe njoftimin e ankuesit.

Kundër këtij vendimi palët kanë të drejtën e ankimit në Gjykatën Administrative, në përputhje me nenin 25 të ligjit për të drejtën e informimit.

Ky vendim u dha sot në datë 23.01.2015.

